

Die kommunistisch Pause

Fünf Minute vor siewe Uhr hat mer am Eingangstor ningehn misse. Sunscht hat de Portier die Fabrikslegemazion verlangt, die an de Abteilungsleiter weitergin, un mer hat sei Potka ghat. Ja, so war des selmols in de Temeschwarer Fabrike. Die Pender sin jo vum Friehzug direkt uf ihre Arweitsplatz un ware schun vill vor der Zeit dorte. Selmols hat mer e Norm ghat, die wu erfüllt hat gin misse. Die meischte Leit awer han meh wie die Norm gschafft un somit a meh verdient. Es is samschtachs un oft a am Sunntach un Feiertach gearweit gin.

Um zehn Uhr war Pause. Dann is gebrot un gsoot gin. Die ganzi Halle hat noh verschiedene Speise geroch: gedinschi Zwiwle mit Aijer, gebrodene Speck. Anri hans Esse vun derhem mitgebrung un nor ufgewärmt: Bohne, gfillt Kraut usw. Selmols war der Thermoplonschon in Modi. Dermit is Kaffee un Tee gekocht gin. Manchi Leit han awer a elektrischi Kochre ghat, an Strom hats jo nit gfehlt in dene Fabrike.

Un in dere Pause is vill un alles Meeglich inkaaft gin. In der Garderobe hat mer „uf borch“ alles zu kaafe kriet, was nit in de Gschäfte zu han war. Natierlich is des alles am Gehaltstach bezahlt gin. Anfang vum Kandia- un serwischem Tschokoladi, Zigrette - hat mer sich je noh Bedürfnis ausstatte kenne mit: Badedress, Pijama, Unerhose, Strimp, Socke, ja sogar Verhietungspille ware zu han. Die Weiwer vun de Derfer han aus ihre Gärten angebot: Erbse, grieni Bohne, Paradeis, Paprika, Spinat un Obst. Sogar Fleisch hat mer sich bstelle kenne. Des is dann „schwarz“ aus dere „Comtim“ kumm.

Wann e Weib Geburtstach ghat hat, is immer in der Pause gfeiert gin. E Kullegin hat in der ganzi Abteilung Bombons angetraa. Die „näkschtere“ Kumradinne han vor em Esse selwer gemachte Likör zu trinke kriet. Mer hat selmols so Gläser ghat, in dene wu Senf war. Dorte nin is fingerschhoch Likör kumm, der is verstholenerweis getrunk gin, es hat sich awer niemande e Schwips angetrunk. Un allerlei Kuche is noh em Esse angetraa gin. Mer hat Rezepter ausgetauscht un es Backe un Koche hat vill Spass gemacht.

Villi, meischt Arweiterinne, han „Zigeinerrad“ gspillt. Des heescht, es han sich elfi zammfunn, die bei jedem Gehalt 100 Lei abgin han. Dann sin Zettle gezoo gin, wer un wann an der Reih is, for 1000 Lei inkassiere. Un mit dere Summe hat mer sich dann was anschaffe kenne. E anri Art, schnell zu vill Geld zu kumme, war der „Reciproc“. Ach dort han mer ingezahlt un je demnoh hat mer dann Geld „rausholle“ kenne, des monatlich abgezahlt gin is.